

ÁR ÑOHO AR KORINTIO

Ár ñoho ar he'mi bi 'yot'a ar Pablo bi mēmpa ya me Nkorinto

Ar nʒengwa

1 Dar Pablo, ár mpotegi ar tsi Hmu Hesukristo ngetho njap'u bi ne Jö. Nuga ne ar ku Timoteo, di peñ'ahe nunar he'minu, nu'ahu gi 'buhü Nkorinto, ne gatho ya ku gi 'buhü har hai Akaya.

²Jö ma tsi Dadahu ne ar tsi Hmu Hesukristo da 'ra'ahu ár nhwēki ne ar hogam'ui.

Ya thogi bi tho ar Pablo

³Nsunda Jö ár Dada ma tsi Hmuhü Hesukristo. Gehnü ma Dadahu hwēgagihü ne ma Jöhu togo hubga ma muihu.

⁴Gehnü togo hubga ma muihu nú'mu di thohü ya thogi, ne njap'u da tsa ga hu'mbabihü yá mui togo tho ar thogi ngu xta thohü. Di hu'mbabihü yá mui ngu xi njakagihü n'ehe.

⁵Ngetho jangu xa di thohü ya dumui di tēñhü ar tsi Hmu Hesukristo, njap'utho n'ehe di ñhehwihü ár humamui.

⁶Ha nu'mu xta thohe ya thogi, di to'mhe da nhup'a ri muihu ne

da max'ahu gi k'onju. Ha nu'mu nhubgagihe ma muihe, njap'utho n'ehe di to'mhe da nhup'a ri muihu, ne da max'ahu gi tsethü ya thogi, di hñöxa nuya di thohe n'ehe.

⁷Ne jangu gi thohü ya thogi nguje, hindi tsayahe di to'mhe njap'u da nhup'a'ihu ri muihu nguje n'ehe.

⁸Tsi kuhü, di nehe gi pöhu nuya nt'utsa da thohe núnu Asia. Xa bi t'otkagihe ar ts'om'ui ne bi the ma ts'edihe, ndi beñhe ja nga kohenu.

⁹Da ent'asehe nda thöga ma tehe. Njap'u hinge nga jamfihe ma ts'edisehe, honse nga to'mhe ár mfats'i Jö togo juxa nuya xi du.

¹⁰Gehnü togo bi maxkagihe, faxkagihēpya, ne di kaxmbenihe da maxkagihe ga k'onje ma'ra ya thogi ngunu.

¹¹Ha nu'ahu, nu'mu gi faxkagihe gi 'yafu Jö, ma da nja nzeýe n'ehe togo da umbabi njamödi xi hwēgagihe nö'ö xka 'yapabihü.

Yo'ö ar Pablo himbi ma Nkorinto ngut'a

¹²Di johyahe, ngetho ma mfenihe xikagihe xta 'yohe xiñho ngu

utkagihe Jö, ne hinxta yo'the ma mfenihe. Hinxta 'buhewa har ximhai ngu yá mfeni'u, xta temfe ár nhwëki Jö. Xta 'buhe n'ar hogam'ui hár nthandi ya meximhai, m'et'o ha ri nthandihu.

¹³Nö'ö xta ot'ahe, di pöhe gehnu tso ri mfenihu, hinge man'ar mfeni. Ne di kaxmbenihe ma gi pöhu xiñho xoge.

¹⁴Ngu ya xka pökagihe n'a tsi tui, go ma ga ja'ahe gi njohyahu. Ha nu'ahu go ma gi jakagihe ga njohyahe n'ehe, nú'mu xta menga ar tsi Hmu Hesukristo.

¹⁵Gehnu ar mfeni ndi pets'i. Jange da bemhö nga thop'u m'et'o nú'mu nda poni nga ekwa Nmasedonia, ne ngi njohyahu ga tsoñ'ahu yo'gi.

¹⁶Hö, njap'u ndi beni nga thop'utho nga k'ös'ahu ne nga ekwa Nmasedonia. Ne m'efa nga penkp'u man'agi, ne ngi faxkagihu nga ju ma 'ñu nga ma har hai Nhudea.

¹⁷Nú'mu nda benga gathoyu, hage ndi ñ'önt'utho. Wa ndi ñhe'be ya meximhai yot'a yá ne n'andi mö hö, ne n'andi hin'ö.

¹⁸Jö hingi yot'a ár ne, jange nuje n'ehe hindi möñhe hö ne hin'ö.

¹⁹Ngetho ár T'u Jö ar tsi Hmu Hesukristo, nö'ö togo da dat'ahe majöni, nuga, ar ku Silbano ne ar ku Timoteo, nunar tsi Hmunu hingi yot'a ár ne. Hár m'uinu, ka datkagihunu nö'ö majöni.

²⁰Ngetho hár te ar tsi Hmu Hesukristo, ka bi nhekinu gatho yá ñhöt'i Jö. Jange di eñhu, hö njap'u, nú'mu di e'spabihu ár nsu Jö.

²¹Jö go bi zetkagihu ma ñ'emuihu hár 'ñu ar tsi Hmu Hesukristo, ne bi hñuskagihu ár Hñö.

²²Ne njap'u bi 'wegagihu ngu yá metigihu'ö. Gehnu ar Hñö da höñhu ha ma muihu ngu n'ar 'bet'o ñhöt'i, ne di to'mhu ga höñhu xoge m'efa.

²³Ha nuga hinxta thop'utho Nkorinto, ngetho di tsu ga zo'ahu nts'edi, ne ga tsot'a ri muihu. Jö pödi di mönga majöni, ne di et'a made ma te hindi kate.

²⁴Hindi nehe ga ja'ahe gi ñ'emuihu ngu di neje. Nö'ö di nehe, ga fax'ahe gi pe'su ar johya, ngetho di pöhe xi nzedi ri ñ'emuihu.

2 Jange nupya xta beni hinga pengi ga map'u ga ja'ahu da zot'a ri muihu.

²Ngetho nu'mu da zot'a ri muihu, togo da hubga ma mui 'mu. Hage hingo nu'u togo xta tsot'wa yá mui.

³Nú'mu nda ot'ahu, da jap'u ndi honi gi jaju ga njohya xka tsomp'u, hinge gi jaju da du ma mui. Di kaxmbeni, nu'mu di johya, gi johyahu n'ehe.

⁴Ngetho xa mi tuka ma mui ne ndi zoni nú'mu da ot'ahu m'et'o. Hinge ndi ne nga tsot'a ri muihu, ndi ne ngi pöhu xa di pes'ahu n'ar döta mhöte.

Ar Pablo pumbabi nö'ö togo xki nts'oki

⁵Ha nu'mu ja n'a togo xi jakagi xi du ma mui, hinge xi jakasega. Tsa ga möñhu xi zu'ahu n'a tsi tui n'ehe, hindi ne ga eñhu thota ár nzeýe.

⁶Hñöjwu, di za ár mfeí nö'ö togo nzeýe'ihu ga kuhu.

⁷Ha nupya mahyoni gi pumbabihu ne hñu'mbabi ár mui, yo ma da du ar ts'oni.

⁸Jange di a'ahu gi uthwu man'agi da hyandi gi pe'sfu ar mhöte.

⁹Da ot'ahũ nor he'mi n'ehe, ndi ne nga pödi ha gi oñu gatho nö'ö di xi'ahũ, wa hin'ö.

¹⁰Ne nö'ö togo gi pumbabihũ, nuga n'ehe. Hö, nuga xta pumbabi nu'mũ di jamhö te ga pumbabi. Xta jap'u di hongari ñhohũ hár nthandi ar tsi Hmu Hesukristo.

¹¹Ne njap'u hinga xojwũ ar 'ñu ar ts'ondöhi. Di pöñu hongahanja da kut'a ya ts'omfeni.

**Ar Pablo xa mi tupa ár
mũ mi 'bũhnũ Ntroa**

¹²Nú'mũ nda tsonũ Ntroa nga mömbahmö ár hoga mhö ar tsi Hmu Hesukristo, da nu xki xogagi ar goxthi.

¹³Mödi xa mi tuka ma mũ, ngetho hinda nth'e'benũ ma tsi ku Tito. Jange da ñ'e'be ya ku, ne da ju ar 'ñu da ekwa har hai Nmasedonia.

**Nu'mũ di 'bũhwihũ ar tsi Hmu
Hesukristo, hyax'mũ di tötehu**

¹⁴Jamödi Jö jakagihũ hyax'mũ ga ntötehu, ngetho di 'bũhwihũ ar tsi Hmu Hesukristo. Ne hagatho di ñ'uhũ nunar hoga mfödi, ngu n'ar hogañuni habũ gatho tsoni.

¹⁵Jö nugagihũ di pe'sfũ ár hogañuni ar tsi Hmu Hesu, di nxañũ mada da nu'u xi mpohö ne nu'u hinxi mpohö.

¹⁶Nuya xi m'edi tsä'u ngu n'ar ñuni hote, ha nuya xi mpohö, ngu n'ar ñuni umba ar te. Togo tsahmö da 'yot'a nuya 'befiyũ.

¹⁷Nuje hindi pathwe ár mhö Jö, ngu ot'a nzeýe honi da dö ar bojö. Nuje xint'axi ma mfenihe di möñhe nö'ö 'rakagihe Jö, ngetho di pöhe di 'bũhe hár nthandi'ö, ne di 'bũ'behe ar tsi Hmu Hesukristo.

**Yá 'begogihe Jö di möñhe
ar 'ra'yo nkohi**

3 Hage di hoñhe man'agi gi numañhogihe. Wa di hoñhe ga hös'ahe n'ar he'mi di ñomañhogihe, ne xka poñhe gi 'rakagihe n'a ngu ot'a nu ma'ra.

²Gese'ihũ ngu ma he'mi'ihẽ xi thuska ha ma mũihe, gehnũ to gatho pödi ne gatho nehe.

³Njap'u nheki ngu yá he'mi'ihẽ ar tsi Hmu Hesukristo, xi t'enk'a ha ma 'yehe. Hinge honse xi t'ot'i, pewi ár Hñö Jö. Hinge ha ya nxindo, ha yá mũ ya jö'i.

⁴Xta möñhe njap'u ngetho di kaxmbenihe di 'bũ'behe xiñho Jö, faxkagihe ar tsi Hmu Hesukristo.

⁵Hinge di beñhe xa di pe'se ar ts'edi te gatho ga othe. Jö go 'rakagihe ar ts'edi ga pehe nunar 'befiyũ.

⁶Ge'ö togo bi hñuxkagihe, ne bi 'rakagihe ar ts'edi ga mpehe har 'ra'yo nkohi. Hinge di teñhe ya 'bepate xi t'ot'i, gese ár Hñö Jö otkagihe ar 'ñu. Ngetho ya 'bepate tsixkagihũ har ndöte, ha nunár Hñö Jö 'rakagihũ ar te.

⁷Ha nu'mũ nuya 'bepate bi t'uni xki t'ot'a ha ya nxindo, xa mi pe'sa ár nsu, jange nuya me Israel himi tsä nda hyandwa ár hmi ar Moise xa mi hyats'i, mödi m'efa ma nda the xoge,

⁸tenguhmö ár döta ár nsu ar 'ra'yo nkohi pepya ár Hñö Jö.

⁹Ngetho nu'mũ nuya 'bepate tsixa har 'bexui ya jö'i, bi t'unga mi nhekiwi ar nsunda, xa töte ár nsunda ar 'ra'yo nkohi, japi da m'u xiñho ya jö'i hár nthandi Jö.

¹⁰Nuya 'bepate mi pe'shmö ár nsu, hingi tsá da ñhuxkwi ár nsu nunar 'ra'yo nkohi.

¹¹Ngetho nu'mu nö'ö thege bi me'sa ár nsu, tenguhmö ár nsu nö'ö hinda ma da thege.

¹²Ngetho di pe'se n'ar döta ndo'mi, jange hindi ntsuhe ga möñhe ar hoga mhö.

¹³Hindi ñhe'behe ar Moise togo mi ko'ma ár hmi, ne njap'u nuya me Israel hinga nda hyanda hanja nda the nunar hyats'i xki thuts'i nda thege.

¹⁴Ha nuyá mfeni'u bi jot'i, ne nuya payu nú'mu né'u ar nkohi mi ja mam'et'o, jot'atho yá da. Ngetho hõse ar tsi Hmu Hesukristo tsá da hñökwabi'u ar dutu kotwabi yá hmi.

¹⁵Njap'utho nuya payu, nú'mu né'u ár t'ofa ar Moise, wande nunar dutunü kotwa yá mfeni.

¹⁶Ha nu xta ñ'emui ar tsi Hmu, da da ar dutu kotwa yá da.

¹⁷Ngetho ar tsi Hmu ge'ö ar Hñö, ne nu'u togo pe'spa ár Hñö Jö, hinte ja te kot'i.

¹⁸Nuju hinte kobgagihu ma dahü. Di hanthwü ár nsunda ar tsi Dada ngu ha n'ar ñhe. Ne ár Hñö Jö 'yo di patkagihu di hñuxa ár nsunda ha ma m'uihu, ne ga tsoñhu di hñöxkagihu ar tsi Hmu.

4 Jange nuje hindi wenthe di pehe nunar 'befi xi hwëgagihe Jö.

²Hindi mpeje nt'ogitho, hindi ntsaje. Hindi othe xi nts'ogagihe, hindi pathwe ár mhö Jö. Nö'ö di pehe, di uhe ár mhö Jö majöni ha ma m'uihe, gehnu numañho ya jö'i di othe hár nthandi Jö.

³Ha nu'mu 'ra xi t'ökwabi, hingi tsá da bö ar hoga mhö di möñhe, gehyü di ma da m'edi.

⁴Ar ts'ondöhi togo ar ndö nuya ngöxapayü, xi got'wa yá da nu'u hingi ne da gamfi. Ne njap'u hinda zutwa ár hyats'i ar hoga mhö utwa ár nsunda ar tsi Hmu Hesukristo, togo di hñöxa Jö ar tsi Dada.

⁵Nuje hindi nõñhese ma m'uihe. Nö'ö di pehe, di 'yoñhe ar mhö, di eñhe nunar tsi Hmu Hesukristo gehnu ar Hmu, ne nuje ngu ri 'begogihe. Di othe njap'u ngetho di pefe ar tsi Hmu Hesukristo.

⁶Ngetho Jö togo bi japa ar ñot'i nda hya'sa madedar 'bexui, go bi xoga ma mfenihu ga hanthwü ár nsunda Jö nheki hár hmi ar tsi Hmu Hesukristo.

Hyax'mu ga 'buhu har ñ'emui

⁷Nunar döta m'ets'inu xi 'rakagihu Jö, jwata ha ma ndo'yohu ngu n'ar tsi ts'oibohai. Ne njap'u da nheki nunar döta ts'edinu go unga Jö, hingo ma ts'edisehu.

⁸Nuje di pefe ar tsi Hmu, xa xi nts'ibgagihe, mödi tsada ga 'ñöñhe. N'andi hindi pöhe te ga pehe, ne hindi 'behe ar ts'eti.

⁹Njukagihe, ha hingi k'at'a togo da maxkagihe. T'entk'athogihe, mödi hinxi nhwatkagihe.

¹⁰Habu gatho di 'yohe, di ñ'enthe ár ndöte ar tsi Hmu Hesukristo, di hoñhe da nheki ha ma ndo'yohe ár te'ö.

¹¹Nuya di 'buhe, hyax'mu di enthe ma tehe da tho, ngetho di teñhe ar tsi Hmu Hesukristo. Ne nunar te ar tsi Hmu da nheki ha ma ngöxando'yohe.

¹²Nuje di ntöxe ar ndöte di hös'ahe ar hoga mhö, ha nu'ahu gi hõñhu ar te hinda göts'i.

¹³Ngu enga har T'ofó: Da ñ'emui, jange da ñö. Nuje n'ehe di pe'se nunar mfeninu, jange di möñhe nunar mhönu, ngetho di ñ'emuihe.

¹⁴Di pöhe, nuna togo bi guxa har ndöte ar tsi Hmu Hesukristo, ma da guxkagihu n'ehe mahyegi ngu bi guxa ar tsi Hmu, ne da 'babgagihu mahyegi habu bi 'ba'ö.

¹⁵Ngetho nuya thogiyu di thohe, da thohe di hoñhe ri ñhohu, ne da zu ma nzeýe nunar nhwëki Jö. Njap'u di nzeýe togo di umba njamödi Jö, ne di nsundabi n'ehe.

¹⁶Jange hingi went'a ma ñ'emuihu. Mödi nunar ndo'yonu di hanthu thege, ha nunu mbo ha ma muihu, 'yo di n'a'yo hyax'mu.

¹⁷Ngetho nuna n'a tsi tui ya nt'utsa di thohu, faxkagihu da hñuxa nunar döta nsunda tobgagihu.

¹⁸Hindi huxa ma dahu nuya te tsä ga hanthuwa, ngetho nuyu ma da thege. Nuju di huxa ma dahu nu'u hingi nheki ne hiñham'u ma da thege.

5 Di pöhu, nu xta nhwata nunar ndo'yonu ngu n'ar ngu di 'buhuwa har ximhai, ma da t'akagihu man'ar ngunu mhets'i, hinxi hoka n'ar ñ'oho, xi hokase Jö, ne hiñham'u da thege.

²Jange nuya payu di 'buthu har ngunu, di gö'su di to'mhu da thetkagihu ar 'ra'yo ngu bi janu mhets'i.

³Njap'u ma da thetkagihu n'ar 'ra'yo he, hinge ga 'buhu tsi nthemfotho.

⁴Ngetho nu'u di 'buhu ha nunar ngunu, tupka ma muihu di zoñhu. Hindi nehu da thömögagihu ma

dutuhu. Nö'ö di nehu, da thetkagihu n'ar 'ra'yo. Ne nunar 'ra'yo ndo'yo ngu n'ar dutu hiñham'u da thege, da go'ma nö'ö man'a thege.

⁵Nö'ö togo bi hyögagihu nga thohu njanu, gehnu Jö. Ne xi 'rakagihu ár Hñö, xi 'bet'ogihu, ne njap'u di pöhu ga hññhu xoge m'efa.

⁶Jange hyax'mu di johya di ndo'mhu. Ne di pöhu, nu'mu di 'buthu ha ma ndo'yohu, hindi 'buhwithohu ar tsi Hmu.

⁷Nuju hindi teñhu nö'ö di hanthu, di teñhu nö'ö hindi hanthu, honse di ñ'emuihu.

⁸Nuju di ndo'mhu, jange xa di nemhöhu ga hehu nunar ndo'yonu, ne ga 'buhwihu ar tsi Hmu.

⁹Jange ma ga umba ma muihu ga othu nö'ö ne'ö, wa hindi 'buhwithohu, wa gar 'buhwihunu.

¹⁰Ngetho mahyoni gatho ma ga 'bahu da hñöskagihu majöni ar tsi Hmu Hesukristo. Ne ga hññhu ma nthöhöhu n'a ngu n'a tengu xta mpehu nú'mu ndi 'buthu har ndo'yo.

Ar 'befi ñhogamui

¹¹Nuje di tsufe Jö, jange di umba ma muihe ga pomfe yá mui ya jö'i. Jö pödi xiñho tema di pe'se ha ma muihe, ne di kaxmbenihe njap'u gi pökagihe n'ehe.

¹²Hindi hoñhe gi numañhogihe man'agi. Nö'ö di nehe, gi 'ñeskagihe ma nsuhe. Ne gi pe'su tema gi thöthwu nu'u exase yá nsu, nete nö'ö oxta mañö, hingi japamasu nö'ö di ñe mbo.

¹³Nu'mu xta 'be ma mfenihe, di othe di nsundahe Jö. Ha nu'mu di benthe, di pep'ahe di hoñhe ri ñhohu.

¹⁴Gatho nö'ö di othe, di jahep'u ngetho ár mhöte ar tsi Hmu tökagihe. Di pöhe, nu'mu bi du n'a pöta gatho, pontho bi du gatho n'ehe.

¹⁵Nö'ö bi du bi pöta gatho, ne nu'u togo tetho, hinda m'ui da 'yot'a nö'ö ne'u. Da m'ui da mepa nö'ö togo bi du, ne bi mengi bi nte bi döpa ár ñho'u.

¹⁶Jange nupya dimap'u, hinga ma ga hanthu ma'ra ngu bense ya jö'i. Hinga hanthu njap'u ar tsi Hmu Hesukristo, mödi xta pöhmöhu ngu benga ya jö'i.

¹⁷Nö'ö togo 'buhwi ar tsi Hmu Hesukristo, xi n'a'yo ár te. Nunar m'ui mi 'bu maham'u, xi thogi, ne xi me'sa n'a ma'ra'yo.

¹⁸Gathoyu xi 'raju Jö, togo ba tsigagihu nga ñhogamuiwihü'ö hár te bi unga ar tsi Hmu Hesukristo. Ne xi 'rakagihu ar 'befi ga xifu ma'ra da ñhogamuiwi Jö n'ehe.

¹⁹Ga möñhu, Jö xi ñhogamuiwi ya jö'i hár te bi unga ar tsi Hmu Hesukristo, ne hingi ts'i'spa nt'ofö yá ts'oki. Ne xi zogagihu ar 'befi ga jafu da nunga nunar mhönu ñhogamui.

²⁰Nuje dar m'ehnihe di pöthe ar tsi Hmu Hesukristo, ne pontho Jö go zo'ahu. Jange di xi'ahu hár thuhu ar tsi Hmu Hesukristo: Ñhogamuiwihü Jö.

²¹Nö'ö togo himbi 'yot'a ar ts'oki, bi thandi ngu ar ts'okte, njap'u bi pökagihu. Ne nuju ndar ts'oktehu, bi thangagihu hinte ma ts'oki di tuhu hár nthandi Jö, ngetho di 'buhwihü ar tsi Hmu Hesukristo.

6 Nuje ngu yá maxtegihe ar tsi Hmu, di xi'ahe hingi fesfu ya ñho xi hwëk'ahu Jö.

²Ngetho ngu engá har T'ofö:

Ha ya hoga pa xta ox'a'i,
ne xta fax'a'i har pa mpöho.

Ha gi öhu, gehnu ar hoga papyá, ne ar pania ar pa mpöho.

³Di ntsuñhe hinto di nehe ga jafe da mfets'e, ne njap'u hinto di pe'sa te da ñömañ'u ma 'befihe.

⁴Nö'ö di pehe, di umba ma muihe da nheki yá 'begogihe Jö. Di pe'se ar ts'eti di thohe ya thogi. Te gatho di k'athe, di thohe ya dumui.

⁵Di thohe ya mfei, njokagihe ha ya fadi. Hexkathogihe ya jö'i 'butho da hyogagihe. Xa di thohe ar 'befi, di a ma t'öhöhe, di thohe ar thuhu.

⁶Nhekitho yá 'begogihe Jö ngetho di 'bue n'ar m'ui xint'axi. Xta 'ñuhe ar hoga mfödi xi t'aje, xta pe'sfe ar ts'eti ma'ra, ne di 'bue ga faxe togo honi. Tsixkagihe ma mfenihe ár Hñö Jö, ne di pe'se n'ar mhöte hingi oxta mañö.

⁷Di möñhe ar mhö majöni. Jö 'rakagihe ar ts'edi ne ar hogamui, faxkagihe habu gatho ga ntötehe.

⁸Ra eskagihe ma nsuhe, ma'ra nugagihe hinter m'ekagihe. Ñhömañ'ugihe ne ñhömañ'hogihe. Nhugagihe ngu dar nemhñöhe, ha di möñhe nö'ö majöni.

⁹Nhugagihe ngu ya n'añ'o, mödi fökagihe. N'andi ya 'butho da thoje, ha di 'buthe. Xa di thohe ya mfei, ne hinxi thogathogihe.

¹⁰Di thohe ar dumui, ha hingi tsaya ma johyahe. Di 'bue ngu n'ar tsi hyoya, mödi di hemfe ya ñho ma'ra. Wande hinte di pe'se, ha go ma metihe gatho.

¹¹Tsi kuhü me Nkorinto, xta xi'ahe xiñho gatho, ne xta kwat'ahe ha ma muihe.

¹²Nuje hindi kothe ma muihe ga mö'ahe, ha nu'ahü hö, xka kothü ri muihu gi mökagihe.

¹³Njanu gi ko'skagihe, xaju ri muihu gi mökagihe. Di xi'ahü njap'u ngu ma bötsi'ihu.

Ár ngugihu Jö togo hö ar te

¹⁴Yo gi nthöskwihu ya jö'i hingi ñ'emui. Ngetho, hage ntsixkwi ar ñho nö'ö hingi ho. Wa tsä da m'u n'at'wu ar 'bexui ne ar hyats'i.

¹⁵Hage ja te ntsixkwi ar tsi Hmu ne ar ts'ondöhi. Wa tema di hñöxkwi n'ar gamfi ne nö'ö hingi ñ'emui.

¹⁶Ár nijö Jö hingi tsä da nthöskwi yá nijö ya tsita emp'ö. Ha nuju yá nijögihu Jö togo hö ar te. Ngu bi ñ'enö:

Ma ga 'bu'be, ne ma ga
'yo'bega'u.

Ne da hyandgagi yá Jögi,
ne nuga ma ga nu ngu ma bötsi.

¹⁷Jange enga ar tsi Hmu:

Poñhu hyehup'u,
yo gi thañhu nö'ö hingi ho,
ne ga tsi'ahü man'agi.

¹⁸Ne gi ñ'engagihu ri Dadagihu,
ne nu'ahü ga eñ'ahü ma t'u'ihu
ne ma t'inxu'ihu,
enga njap'u ar tsi Hmu togo
pe'sa gathu ar ts'edi.

7 Tsi kuhu, ngetho Jö xi
'rakagihu nuya ñhöt'iyu, ma ga
hehu gathu nö'ö japa da ts'oka ma
ndo'yohu ne ma mfenihu, ne ga 'buhu
n'ar hogam'ui ngetho di tsufu Jö.

**Ar Pablo bi njohya mi bödi xki
'yot'wa yá ntso'mi ya me Nkorinto**

²Pe'skagihe ar mhöte. Hinto xta
ot'wabihe ar ts'om'ui, hinto xta
ts'okwa ár mfeni, ne hinto xta kahe.

³Hindi xi'ahe njap'u ngetho di ne
ga tsu'ahe. Ngu xta xi'ahe m'et'o, xa
di mö'ahe. Nu'mu di 'buhe wa ga
tuhe, hinga hek'ahe di mö'ahe.

⁴Nuga hinte di pets'i te ga
koñ'ahü, di es'a ri nsuhu, gehnu
hubga ma mui, ne xa di johya
madedu ya thogi di thohe.

⁵Ngetho xa majöni nú'mu nda
tsöhewa Nmasedonia, hinte da
pe'se ar tsaya, ngetho habu gathu
ndi thohe ya dumui. Nuya himi
jamfi mi jusje ar hñö, ha nu har
nijö mi tuka ma muihe ya ku.

⁶Honse Jö togo hu'mba yá mui
nu'u ja te tupa yá mui, bi hñubga
ma muihe mi zo ar ku Tito.

⁷Hinge hönse da njohyahe mi
zohö. Bi jakagihe da njohyahe, bi
metkagihe hanja ga jafu bi njohya.
Ne bi xikagihe hangu gi mökagihu
ngi zoñhu ngi hongagihu, ne njap'u
bi jakagi bi hñuxa ma johya.

⁸Ngetho mödi da tsot'ahü ri muihu
har he'mi da peñ'ahü, hinte tuka
ma muipya, ngetho da pödi da
tsot'a ri muihu 'ra ya tsi pa.

⁹Ha nupya di johya, hinge nú'mu
da pödi bi zot'a ri muihu. Di johya
ngetho nunar nzot'amui bi ja'ahü
ga 'yothwu ár ntso'mi. Bi du ri
muihu ngu numañho Jö, ne njap'u
hinto da ts'ok'ahe.

¹⁰Ngetho nunar dumui numañho
Jö, tsixkagihu ga othwu ár ntso'mi
ne ga mpohu, ne hinga möñhu
m'efa hinda othu xiñho. Nunar
dumui tsase ya jö'i, hönse tsixa har
ndöte.

¹¹Ha nu'ahü xi zot'a ri muihu
ngu ne Jö. Njanu xi max'ahü ga
umba ri muihu nö'ö ngi othu, ne
ga ñöngagihu. Bi ja'ahü bi mbo ri

kwehũ ne ga pe'su ar ntsu. M'efa ngi ne ngi hyandgagihũ, ne ga umfu ár mfeĩ togo xki 'yot'a ar ts'oki. Gathoyũ nheki ga umba ri muihu ga 'yothũ xiñho.

¹²Nú'mu da peñ'ahũ nunar he'minu, hinge hõnse ndi benga nõ'õ togo bi 'yot'a ar ts'oki, ne nõ'õ togo bi nts'okwabi. Ndi ne ngi põhu hangu tup'a ri muihu gi bengagihe hár nthandi Jö.

¹³Jange nu nda põhe ga njohyahu, bi hñubga ma muihe. Ne xa da njohyahe nda hanthwe ár johya ar ku Tito. Nú'mu mi zoñ'ahũ bi hñuxa ár ts'edi.

¹⁴Nú'mu nda es'ahũ ri nsuhu ndi petwa ar Tito ri m'uihu, hinxta 'be ma tsã. Gatho nheki majõni, njangu majõni gatho nõ'õ xta xi'ahũ. Bi njap'u nõ'õ da xipa ar ku Tito n'ehe.

¹⁵Ne hyax'mu huxa nunar mhõte pes'ahũ, nú'mu benga hanja ga 'yo'thu ne hanja xa ga numansuhu.

¹⁶Di johya ngetho di kaxmbeni gi othu xiñho gatho.

Ar mfats'i m'empa ya ku

8 Tsi kuhũ, di ne gi põhu nuya ñho xi hwëkwa Jö nuya nijö 'bukwa Nmasedonia.

²Mödi xi thohyũ nzeye ya nt'utsa, xa xi me'sa nzeye ar johya. Ne mödi xa ya tsi hyoya, xa xi unga yá mfats'i.

³Di damajõni go bi nese'u nda unga yá mfats'i ngu bi maxa yá ts'edi, ne xi unga xa nzeye ngu xi zu yá ts'edi.

⁴Xa bi 'yakagihe ar möte nga umfe ar seki nda mfaxte ha nunar ñhonu t'ot'wa ya gamfi.

⁵Hinge ndi to'mhe njap'u. M'et'o bi 'yent'a xoge yá te nda mepa ar tsi Hmu, ne m'efa bi 'yent'a yá 'befi ha ma 'yehe, ngetho njap'u mi ne Jö.

⁶Jange xta afe ar ku Tito, da map'u da xi'ahũ gi jwathũ gi munsu nunar mfats'inu nhwëkwabi ya tsi ku, gehnu ma yapa xki dum'õ.

⁷Ngetho gatho gi 'buhu xiñho: xa gi pe'su ri jamfihu, gi põhu te gi mõnhũ, gi põthwu ár mhõ ar tsi Hmu, xa gi ne gi pefu Jö, ne xa gi mökagihe. Umba ri muihu gi hwëkwabihu ma'ra.

⁸Hindi 'bep'ahũ. Hõnse di xi'ahũ nuyá hogamui ma'ra, ne ga nu ha majõni tsit'a ri muihu gi mõhu ma'ra.

⁹Ngetho gi põhu te xi hwëgagihũ ma tsi Hmuhu Hesukristo. Mödi mi pe'sa xoge, bi ñhoya, ha nuju ndi ñhoyahu, dá pe'su xogepya.

¹⁰Di ne ga xi'ahũ, xiñho gi jwathũ nunar 'befi ga du'mhu ma jeye. Nu'ahũ hinge hõnse ga beñhu, ga njohya ga du'mhu ga 'yothũ.

¹¹Jange jwathũ nunar 'befi. Njangu ngi nehũ ngi 'yothũ, njap'u gi nehũ gi jwathũ n'ehe, ngu nda zu'ahũ ri ts'edihũ.

¹²Nu'mu xa majõni gi nehũ te gi uñhu, Jö numañho gi uñhu nõ'õ gi pe'su. Hingi a'ahũ nõ'õ hingi tsu ri ts'edi gi uñhu.

¹³Yo ma gi beñhu di jap'u di honi da m'u xiñho 'ra, ne nu'ahũ gi thohu ar k'at'i.

¹⁴Di nega, nuya gi pe'su ya ñho nuya payu, da tsã gi faxu nuya hinte pets'i. Ne m'efa di pe'syu, ne da tsã da max'ahũ habu gi k'athu n'ehe, ne gatho gi 'buhu mahyegi.

¹⁵Jangu engá har T'ofó: Nö'ö togo bi go nzeye, himbi bongwabi, ha nö'ö bi go tx'utho, himbi k'at'wi.

¹⁶Jamödi Jö bi umbá ar ku Tito ar mhöte mahyegi ngu nö'ö di pēs'ahü.

¹⁷Majöni da áfe ar möte ma nda k'ös'ahü, mödi mi nese nda map'u, ngetho xa mö'ahü.

¹⁸Ne di peñhe da mewi ar Tito n'ar ku togo e'spa ár nsu gatho ya nijö habü xa mönga ar hoga mhö.

¹⁹Hinge honse ar 'befinü xi t'umbabi. Nuya nijö bi hñuts'i ga me'behe ga 'yohe ar 'ñü, gar möhe ma ga tsohe nunar mfats'inü. Nuna di heñhe di nsundahe ar tsi Hmu, ne da nheki ma hogamüihü.

²⁰Njap'u hinda tsá togo da ñöman'ugihe nunar döta mfats'inü o ha ma 'yehe.

²¹Di umfe ma müihe ga othe xiñho ar 'befi hár nthandi Jö ne ha yá nthandi ya jö'i.

²²Di peñ'áhe ñ'owi'u man'ar ku, xta hanthe ha ya 'befi xta umfe xi umbár müi xi mepa Jö. Ne nupya xi hñuxa ár ts'edi, ngetho kaxmbeni gi faxtehu.

²³Nor ku Tito gehnü ma ñ'ohü ne ma maxte di pep'áhe. Ha nu ma'ra ya ku go xi mehna ya nijö da hñös'ahü ar nzengwa, ne njap'u da ñe'spa ár nsu ar tsi Hmu Hesukristo.

²⁴Utwabihüü ri mhotehu, ne njap'u da hyanda ya nijö majöni nö'ö di es'ahü ri nsuhü.

9 Hinga mahyoni ga pengi ga ot'ahü ga bemp'ahü nunar mfats'i di pempabihü ya gamfi.

²Ngetho di pöhe xa gi ne gi mfaxtehu, ne xta xipabihe ya ku me Nmasedonia. Jange nu'u xi njohya da uñ'u n'ehe, ngetho da xife nu'ahü

gar menguhü Akaya, pe'sa n'a njeýe xa xka nehü gi uñhü ri mfats'ihü.

³Nu'mü xta peñna ya ku da m'et'o, di ne ga tsu'áhe ngu xta es'áhe ri nsuhü. Xka möhep'u, xka ñhoju ngu xta mö.

⁴Ngetho nu'mü ga me'be 'ra ya me Nmasedonia ne da diñ'ahü hinxka ñhoju, ga 'be ma tsahe, ngetho xta möñhe xka ñhoju. Nu'mü da njap'u gi 'behü ri tsahü n'ehe.

⁵Da beni mi mahyoni nga peñ'ahü xi m'et'o nuya kuyu, ma da nu ha xka jwathü xka johü nunar mfats'i xka ñöthü ngi uñhü. Ne ngi ñhoju gi uñhü ngu n'ar mfats'itho, hinge gi uñhü ngetho di á'áhe.

⁶Get'ö di xi'ahü ngu enö: Nö'ö togo tx'utho pot'i, tx'utho xofó n'ehe. Ha nö'ö pot'a nzeye, nzeye xofó n'ehe.

⁷N'a ngu n'a da unga ngu xi beni, hinto da hyoka nö'ö uni, ne hinda uni ngetho njapi. Jö mödi nu'u togo johya uni.

⁸Jö pe'sa ar ts'edi da hwék'ahü gatho nö'ö gi k'athü, ne da bonk'a'ihü gi 'yothwü ar ñho ma'ra.

⁹Ngu engá har T'ofó:

Bi hyeni ne bi umbá ya hyoya.

Nunár ñhogajö'i hiñham'u da thege.

¹⁰Jö togo umbá te da mot'a ar mot'i ne 'winga togo ñuni, dá max'ahü gi pe'su nzeye ar sofo, ne gi ñhogajö'ihü xa gi faxu ma'ra.

¹¹Ne hinte gi k'athü, xa gi johyahü gi uñhü ar mfats'i, ne njap'u ma'ra da umbá njamödi Jö nunar mfats'i di hö'sfe.

¹²Ngetho nunar mfats'inü hinge honse faxa nuya gamfi tho ar k'at'i, njap'u nzeye ya njamödi t'umbá Jö.

¹³Ha nunar 'bëfinu, nzeýe da 'ñe'spa ár nsu Jö nú'mu hant'a'ihu tengu gi othwu ár hoga mhö ar tsi Hmu Hesukristo, ne hanja gi johyahu gi faxu'u ne gatho nu'u tho ar k'at'i.

¹⁴Ne xa di mö'ahu da 'yapa Jö da max'ahu, ngetho Jö xa xi hwëk'ahu n'ar hogamui.

¹⁵Jamödi Jö, togo xi 'rakagihu n'ar nt'uni hingi tsä ga möñhu tengu ár döta.

Ar Pablo ñonga ár 'bëfi

10 Nuga dar Pablo, ne di a'ahu hár hogajö'i ne hár mhöte ar tsi Hmu Hesukristo, mödi enga 'ra nú'mu di 'bup'u, di tset'athohu, ha nú'mu di 'bu yap'u, xa tsë ma ne ga ñö.

²Jange di a'ahu ar möte, yo ma gi jaju ga ñö nts'edi xka map'u. Ngetho xta ekwatho nu'u togo enö di ot'athohe ngu benga ya meximhai.

³Mödi di 'buhewa har ximhai, hindi pehe ngu ot'a ya meximhai.

⁴Ngetho ngu n'ar ndogu di ntuñahe. Ha numa bojöhe hinga yá meti ya jö'i, pe'spa ár ts'edi Jö da hwatwa yá ts'edi ya ñ'uni.

⁵Ne da jö'sa gatho ya mfeni ot'a ñ'ets'i, ntöxkwi ya jö'i hingi hegi da bö Jö, ne da gu da zits'i da 'yöta ar tsi Hmu Hesukristo.

⁶Ne di 'buhe ga umfe n'ar mfei nu'u togo hingi ot'a nö'ö nsipabi, di to'mthohe gi tsoñhu gi 'yothu gatho nö'ö di xi'ahe.

⁷Nu'ahu gi hanthu nö'ö oxta mañö. Nu'mu n'a ñ'emui ár meti ar tsi Hmu Hesukristo, dá beñ'ö di

njahep'u, ár metigihe ar tsi Hmu n'ehe.

⁸Mödi da tsahmö xa ga exa ma nsuhe, hinga 'behe ma tsähe. Ngetho ar tsi Hmu xi 'rakagihe ar ts'edi ga hoñ'ahe ri ñhohu, hinga ga ts'ok'ahe ri mfenihu.

⁹Di xi'ahu njanu, hindi ne gi 'ñeñhu di ne ga pi'ahu ha ya he'mi di peñ'ahu.

¹⁰Ngetho majöni 'bu 'ra togo enö: Nuyá he'mi xa ñö nts'edi ne pe'sa ar ts'edi, ha nú'mu 'bukwa hinte pe'sa ár ts'edi, ne hinto tsupa ár mhö.

¹¹Nu'u togo mönga njap'u, dá bödi n'ehe, ngúr nts'edi di ñöhe ha ya he'mi hindi 'buhep'u, tsä ga njahep'u n'ehe nú'mu di 'buhep'u.

¹²Ngetho hindi ne ga ñhe'behe 'ra nu'u 'yop'u ñ'exase, ne ñhekse n'a ngu n'a. Xa xi 'be yá mfeni.

¹³Nuje hindi thothe di exe ma nsuhe. Hönse da tsä ga e'sfe ár nsu ár nt'eni ar 'bëfi xi 'raje Jö. Njap'u xta tsoñhe habu gi 'buhu.

¹⁴Nuje hinga xa di exe ma nsuhe, ngu ga othe nu'mu hinxta tsoñhe xta hös'ahe m'et'o ár hoga mhö ar tsi Hmu Hesukristo.

¹⁵Hindi nehe ga exe ma nsuhe ha yá 'bëfi ma'ra. Mödi hö, di to'mhe da te ri jamfihu, ne da tsä da nunga ma 'bëfihe habu gi 'buhu, di zonga habu xi benga Jö.

¹⁶Ne ga möñhe ar hoga mhö di manu habu gi 'buhu. Ne hindi nehe ga kuthe habu xi mpe ma'ra, yo ma ga exa ma nsuhe ha yá 'bëfi xi 'yot'u.

¹⁷Ha nö'ö togo ne da 'ñexa ár nsu, dá 'ñe'spa ár nsu ar tsi Hmu Hesukristo togo ár meti ar 'bëfi.

¹⁸Ngetho hingi nhumañho nö'ö exase ár nsu. Nhumañho nö'ö togo numañho Jö n'ehe.

11 Xömhö gi pe'skagihu ar ts'eti nu'mu ga mönga 'ra ya mhö di beni, mödi wande xta 'be ma mfeni. Hö, di ne gi tsetkagihu.

²Ngetho xa di tuse di mö'ahu, ngu mö'ahu Jö. Xta 'wek'ahu ngu n'ar nxutsi 'bui xint'axi, pontho gi nthötwihu n'adar döme, gehnu ar tsi Hmu Hesukristo.

³Ha di tsu da mponga ri mfenihu, ngu bi pomba ár mfeni ar Eba bi ka ar k'eñö ma nts'o, ne hingi umba ri müihu gi teñhu ar tsi Hmu Hesukristo.

⁴Ngetho gi numañhohu togo tsoho ut'ahu man'ar mhö nongar Hesu, hingi ñehewi nö'ö xta ut'ahe. Ne gi höñhu nu'mu xi'ahu man'ar hñö n'añ'o hingár Hñö Jö xka hñöñhu, ne togo mönga man'ar mhö hinga ngu ar hoga mhö xka pöhu. Gatho gi tsetathohu.

⁵Di beni hinte tökagi nuya döta mpote ngu eñ'u.

⁶Ngetho mödi hindi pödi ga ñö xiñho, di pödi te di mö. Go xka hyandasehu.

⁷Hage hinda ot'e xiñho nú'mu hinda exka ma nsu ne go da es'ahu, ngetho hinte da a'ahu nú'mu nda hös'ahe ár hoga mhö Jö.

⁸Xta hömba ma'ra ya nijö xi 'raka ma njut'i ne da tsä ga pep'ahu.

⁹Ne nú'mu ndi 'bup'u ne ndi thohmö ar k'at'i, hinte da a'ahu. Nuya ku ba e Nmasedonia bi 'rakagi nö'ö ndi honi. Hinte xta a'ahu, ne hinte ma ga a'ahu.

¹⁰Di mönga nunar majöninu, ngetho ar tsi Hmu Hesukristo 'bu

ha ma müi. Gatho ar hai Akaya hinto ma da hñögagi ga exa ma nsu ga petwabi nuna di ot'e.

¹¹Yo'ö. Hage hindi mö'ahu. Jö pödi hö, di mö'ahu.

¹²Ne ma ga jap'utho. Hinga hegi nu'u togo honi hanja da 'ñexa yá nsu, enö mpe'u mahyegi nguje n'ehe.

¹³Ngetho nuyu ya kate mpote, ya hyate 'bego, ot'e ngu yá mpotehmö ar tsi Hmu Hesukristo.

¹⁴Hinto da 'yotho, ngetho gese ar ts'ondöhi ot'e ngu n'ár enxé Jö n'ehe.

¹⁵Jange hinga 'yothu nu'mu nuyá 'bego ar ts'ondöhi ot'e ngu ya hoga 'bego emp'ö. Katetho, ha m'efa ma da t'umba ár njut'i yá ts'o'befi.

Ya ugi bi tho ar Pablo ngu ár mpote ar tsi Hmu

¹⁶Man'agi di xi'ahu, hingi nugagihu ngu n'ar jö'i xi 'be ár mfeni. Ha nu'mu gi ne gi nugagihu njap'u, nugagihu, ne da tsä ga exa n'a tsi tui ma nsu.

¹⁷Nuna di xi'ahu hinxi 'raka Jö, go di exase ma nsu ngu n'a xi 'be ár mfeni.

¹⁸Ngetho nzeye exase yá nsu ngu yá mfenise'u, ma ga exka ma nsu n'ehe 'mu.

¹⁹Nu'ahu gi pe'su n'ar hoga mfeni, hanja gi johyahu gi oxu nu'u xi 'be yá mfeni.

²⁰Gi tsetathohu nu'u togo ja'ahu ngu ne'u. Juk'ahu nö'ö ne'u, ne hömp'ahu nö'ö te gi pe'su. Ot'a ndöta, ne gi numañhohu nu'mu wande 'ra'ahu ya mpetgu.

²¹Gehnu ma m'etsahe, hinda juhe ar ts'edi ne nga ja'ahu ngu bi

ja'ahũ'u. Nu'mũ nu ma'ra exa yá nsu, nuga ma ga exa ma nsu n'ehe, mödi di ñö ngu n'a xi 'bẽ ár mfeni.

²²Hage exa yá nsu gehyũ ya ebreo. Dar ebreoga n'ehe. Wa eñ'u xpa e ha yá m'ui ar hnini Israel. Ja xta ekanũ n'ehe. Hage yá 'beto ar Abra. Ár 'betogi n'ehe.

²³Hage yá 'bego ar tsi Hmu Hesukristo. Di tóta gatho'u. Di ñö ngu n'a xi 'bẽ ár mfeni. Nuga xa xta mpefi. Hingi tsá ga pede hangu ya mfeĩ xi t'akagi. Habu gatho xi jokagi, ne 'bũtho xi thogagi.

²⁴Kut'a mpengi xi mebgagi ya xodyo, 'bẽ n'ar mfeĩ da zũ yon'ate mfeĩ n'a ngu n'a.

²⁵Hñu'gi xi n'webgagi ya t'o. N'agi bi thoxkagi ya nk'ahni. Hñu'gi xi yũ ar motsa habũ ndi 'yo har dehe. Xta m'e n'apa ne n'axui har ñhontho.

²⁶Xa xta 'yo ya 'ñu. Xta k'ont'i nga jöt'a ha ya döthe. Xta k'ot'a ha yá 'yẽ ya bẽ. Xta k'ont'a hayá 'yẽ ma mixodyo'be ne nu'u hingya xodyo. 'Bũtho nga tu har hnini, ha ya ot'at'ohõ, har ñhontho ne hayá 'yẽ nu'u ya ku emp'õ.

²⁷Xa xta tho ar 'befi ne ar nzabi. Xta a ma t'öhö. Xta tho ar thuhu ner duthe, himi otho te nga tsi. Xta tho ar tsẽ. Xi k'at'a ma dutu.

²⁸Mödi njap'u, nö'ö töte tuka ma mui, hyax'mũ di beni tengu 'bu ya ku.

²⁹Togo thor hñeni ne nuga hindi tsamañ'u. Wa togo njapabi da mfets'e, ne nuga hingi tsot'a ma mui.

³⁰Nu'mũ mahyoni ar nt'ets'i, ma ga exka ma nsu hinte ja ma ts'edi.

³¹Jö togo ár Dada ar tsi Hmu Hesukristo, ne ár meĩ ar nsunda, pödi hindi mönga ar nhemhñö.

³²Núnũ Ndamasko nunar ts'ut'wi mi faxa ar ndö Aretas, bi got'atho gatho ar hnini nda mhikagihmö.

³³Ha bi t'etkagi ha n'ar 'bõts'e, ne bi jöbgagi ha n'ár oki n'ar ngu mi 'bũ har jödo. Njanũ da k'ot'a ha yá 'yẽ'u.

Ar m'ite mi foxa hár ndo'yo ar Pablo

12 Majöni hinte faxkagi ga exa ma nsu. Hõnsẽ ma ga xi'ahũ nuya ngu ya t'i ne ya nt'udi xi 'raka ar tsi Hmu.

²Di pö n'ar ñ'ohõ mi 'bũhwi ar tsi Hmu Hesukristo, xi tho 'ret'amagoho njeýe bi njuts'i ba tsonga har hñu mhets'i. Hage mi oda hár ndo'yo wa xki bõni, hindi pödi. Jö go pödi.

³Hö, di pö nor ñ'ohõ'ö. Hage mi oda hár ndo'yo wa xki bõni, hindi pödi. Jö go pödi.

⁴Ne bi ts'ixa har nzathom'ui habu bi 'yo 'ra ya mhö hiñ'othowa hanja da 'ñenö, ne hinxi t'umba ar seki ar meximhai da mö.

⁵Nunar ñ'ohõnũ tsá ga e'spa ár nsu. Ha nuga hinga ma ga exa ma nsu, hõnsẽ ga exa ma nsu hindi tsedi.

⁶Nu'mũ ga nemhö ga exa ma nsu, hinxta 'bẽ ma mfeni, ngetho majöni. Di thok'atho njap'u, ne gatho da bökagi hõnsẽ ngu handgagi di 'bui, ne oxkagi di mö.

⁷Ne hinda thotho ga exa ma nsu da handa nu'u ngu ya t'i, bi t'akagi n'ar m'ite foxa ha ma ndo'yo. Gehnũ n'ár 'bego ar ts'ondöhi febgagi, hingi hegagi da thota ma ñ'ets'i.

⁸Hñu'gi xta apa ar tsi Hmu da hñögagi.

⁹Ne xi 'ñengagi: Ñhogamui nö'ö xta hwëk'a'i, hõnsẽnũ gi homi.

Ngetho ma ts'edi da nheki xiñho ha ri ngwent'i. Jange ma ga ñhogamui ga exa ma nsu ha ma ngwent'i, ne njap'u da nheki ha ma m'ui ár ts'edi ar tsi Hmu.

¹⁰Jange ngetho di tenga ar tsi Hmu Hesukristo, di johya ha ma ngwent'i, ha ya nts'ani, ha ya k'at'i, ha ya nt'utsa, ha ya dumui. Ngetho nú'mu xi wentk'agi, töte di pe'sa ar ts'edi 'mu.

¹¹Xta exa ma nsu ngu n'a xi 'be ár mfeni. Ha nu'ahu go ga jakagihu, ndi 'ñep'ahmöhu ngi ñömañhogihu. Ngetho hinte tökagi nuya döta mpote eñ'u, mödi nuga hinter m'ekagi.

¹²Nú'mu nda 'buhwihup'u, xa da tseti ndi otk'a ya döta nt'udi, ne nu'u ya 'befi hingi tsa da 'yot'ase n'ar jö'i. Njap'u nheki ár mpotege ar tsi Hmu.

¹³Tema hingi ñhehwihu nu ma'ra ya nijö 'mu. Hönse nu'ahu hinda a'ahu gi faxkagihu. Di xi'ahu gi pumgagihu.

Ar Pablo mö ma da k'ö'sa ár hñu'gi

¹⁴Xta ñhoki ga tsoñ'ahu ár hñu'gi. Ne di xi'ahu hinga ot'ahu ar xuhña, ngetho hindi homp'a nö'ö te gi pe'su, go di hoñ'a'ihu. Hinge ya bötsi kwata ya m'ets'i da zokwa yá dada, nuyá dada kwata te da zokwa yá bötsi.

¹⁵Ne nuga xa ga njohya ga te gatho ya ñho di pets'i, ne ga tese ma ts'edi di hoñ'a ri ñhohu. Nú'mu hyax'mu huxa ma mhöte di pes'ahu, hage ma gi hyehu gi mökagihu.

¹⁶Nuga hinte ma mfats'i xta hömp'ahu, mödi 'ra enö xi nts'ogi, jange xta ha'ahu.

¹⁷Hage xta juk'ahu ar bojö xi 'ya'ahu nuya xta pehni xpa tsoñ'ahu.

¹⁸Nú'mu nda apa ar möte ar ku Tito ne nö'ö man'ar ku ma ba tsoñ'ahu, hage ja te bi hñöñ'ahu ar Tito. Hin'ö. Ngetho n'adar mfeni di pe'se, get'ö ar 'ñu di teñhe.

¹⁹Ha gi beñhu di hoñhe hanja gi numañhogihe. Hin'ö. Di 'bue hár nthandi Jö, di 'bu'behe ar tsi Hmu Hesukristo di möñhe nö'ö xta ñöhe. Hönse di hoñhe ri ñhohu ne da te ri ñ'emuihu.

²⁰Tuka ma mui nú'mu xka tsomp'u, hinga ma ga tiñ'ahu ngu di nega, ne nu'ahu hingi ma gi hyandagihu ngu gi nehu. Nu'mu gi pe'su ya tuhni, gi hyojwu yá ñho ri ñ'ohu, gi po ri kwehu, gi ñhehu, gi juxu ya nhemhñö, gi thentehu, hingi ne gi nuhu ri ñ'ohu, ne hingi mpehu mahyegi, gehnu tuka ma mui.

²¹Tuka ma mui n'ehe, nu xka map'u, Jö da jakagi ga 'be ma tsa ga nzoni. Ga 'ba made ga apabi da maza nu'u togo xi 'yot'a ya ts'oki mam'et'o, ne hinxi 'yot'wa yá ntso'mi. Nuyá ts'oki xi nts'otho, 'bengwi ya jö'i hinxi nthötwi, ne yá ts'onhe.

13 Nunar hñu'ginu xka map'u. Gatho nuya ts'oki ma da thuxa ar mfei, da mö hö njap'u, hönse nu'mu yoho wa hñu da damajöni.

²Ha nuga da xi'ahu nu nda 'bup'u, ne nupya di 'yo yap'u di xi'ahu, gatho nu'u xi 'yot'a ya ts'oki ne gatho numa'ra, nú'mu xka map'u, hinto ma ga et'atho ma xutha nö'ö xi 'yot'e.

³Nu'mu gi ne gi pöhu xiñho, hage ar tsi Hmu Hesukristo xi'ahu nö'ö

di mönga ne hindi mönsega, pöhu ar tsi Hmu hingi k'at'a ár ts'edi da zo'ahü. Nunü xa pongwatho ár ts'edi.

⁴Ngetho mödi bi tho bi ts'uta har pont'i hinte mi pe'sa ar ts'edi, nupya 'bui pe'spabi ár ts'edi Jö. Di njahep'u n'ehe, di 'bu'behe hinte di pe'se ma ts'edihe. Nuje di pe'sfe ár ts'edi Jö n'ehe ga zo'ahe.

⁵Bensehu, ha gi pe'su ar ñ'emui. Tsasehu n'a ngu n'a, wa hinxka 'ñethu ha ri muihu ar tsi Hmu Hesukristo. Wa hinxka thohu xiñho nga tsasehu.

⁶Mödi di kaxmbenihe gi beñhu xta thohe xiñho nunar tsatinu.

⁷Ne di afe Jö da max'ahü hingi 'yothu nö'ö hingi ho. Hindi hoñhe da nheki xta thohe xiñho ar tsati. Di nehe gi 'yothu nö'ö xiñho, mödi da thandgagihe hinxta thohe xiñho nunar tsatinu.

⁸Ngetho hinte tsä ga pehe di nemhö ga ko'mhe nö'ö majöni. Hönse tsä ga mpehe ga jafe da nungi.

⁹Jange di johyahe hindi pe'se ar ts'edi, ha nu'ahü hö. Ne xa di afe Jö da max'ahü gi 'buhü n'ar m'ui xint'axi.

¹⁰Jange di ot'ahü nunar he'minu hindi 'bup'utho, di ne xka map'u hinga zo'ahü nts'edi. Ga juka nunar ts'edi xi 'raka ar tsi Hmu ga fax'ahü da te ri jamfihu, ne hinge ga ts'omp'a ri m'uihu.

Ar Pablo pempa nzengwa ya ku ne tetwa Jö

¹¹Jange tsi kuhü, njohyahu, umba ri muihu gi pe'su n'ar m'ui xint'axi, hñu'mfu ár mui ri ñ'owihu n'a ngu n'a, pe'su n'adar mfeni ne ar hogam'ui. Ne gi 'buhwihu Jö togo unga ar hogam'ui ne ar mhöte.

¹²Nzengwahu n'a ngu n'a di 'benga ar t'ek'ei.

¹³Gatho ya ku di 'buhewa, di peñ'ahe ar nzengwa.

¹⁴Dá hwëk'ahü ár nt'uni ar tsi Hmu Hesukristo, dá 'ra'ahü ár mhöte Jö, ne gi 'buhwihu ár Hñö Jö. Dá njap'u.